

黔遊記程



黔中郡建自楚元時分隸湖廣明洪武初仍之  
故記黔當從楚始 廉使公籍於荆而武陵以  
上遊寢宿所未經辰沅又

搃戎公戰勝窰包絡五溪踞黔戶限事不勝書  
且夫記非鄴道元注山海也圖其閉塞阨陜攻  
守出入形勢與夫土田肥瘠畚漢交錯制馭之  
術儲以待用其斯為善遊矣黔入玉屏抵貴陽  
程無過十里無過五百然中介牂牁江直通古

嚴序

州八萬李襄毅平播駐黎峨里寨大風洞可伏  
甲而黃絲聞有桑濮遺音陳時臬事者所當臨  
眺躊躇肄業及之也成昔吏汾上 公行部從  
數騎草山而下後渡芦溝 公舊部曲皆能言  
鼓樓擒盜事延徘徊商洛間久不得當辛未冬  
上幸中嶽 公腰弓矢侍環衛躡健如飛

上竒之問何官以南陽守對輒大喜仍歲再遷嗟  
乎古今兼文武穀器者幾人以三十年有備無

患之具與時際會如楊萬里提刑東粵孝宗嘉  
其書生知兵駁レ大用天下聞而壯之夫孰知  
公退然若不勝衣琴歌暇豫丹鉛弗輟即庶  
務填委息レ猶唱渭城賢者頽可測欵攬是記  
知與田蒙叟黔書並足為黔增重荆楚歲時識  
其小者已爾

乾隆二十年長至日舊屬吏嚴遂成頓首拜撰

黔遊記程

拙圃崔應階吉升氏著

乙亥春余起復入

覲待

命甫半月即荷

殊恩補黔臬

陛辭於四月朔十日南行重五抵荊州溯武陵舟車所  
至老馬素識若滇黔遠服兒時披圖一過身未經歷  
茲奉

黔遊記程

命西南行凡目之所遇皆先人昔年立功効命處山川  
如故風樹彫零振觸愴感是月二十一日至武陵易  
小舟一曰麻陽船長而狹艙高二尺許載可十餘石  
出入匍匐空而僂一曰鯁船形若草履銳首翹尾艙  
容三四人稍能屈伸上覆箬篷兩壁裝板露數寸可  
坐眺憶昔隨任汀建溫處所乘油燭江山等船頗相  
類二十二日乙未放舟陰雨於時農切望雲而有司  
祈禱甚殷此商霖也午後雨止歸雲擁樹水面風來  
不知身在炎暑中行二十里過龍頭塘隔岸短垣臨

水竹木交加湏臾漁人網集鱗魚如雪曩余在皖江  
日作供具不甚惜今視此無異雲間白龍鮓矣又五  
里薄暮宿

丙申曉色蒼涼溪添新漲十餘里至荷斧山橫江蜿蜒  
上僧舍數椽隱約林杪下烟火百餘家古道濱江  
即滇黔之驛路也西數里曰周溪一巨鎮與荷斧山  
相望去武陵四十里再十餘里上涼節灘溪流稍急  
渙人橫流設木柵濶數丈上如平臺前仰後俯柵尾  
插竹如籬魚之順流來者皆入柵上坐以取之二十

黔遊記程

二

里至桃源縣層樓見數里外彷彿吾鄉黃鶴縣無城  
面臨河東岸岡巒湧翠一目無際二十五里至白馬  
渡陸路入黔者於此以舟濟也兩岸重岡合抱舟行  
其中時木筏蔽江下綿亘數里緯路阻塞筏盡處始  
停舟

丁酉夜雨曉霽水發數丈羣山萬壑雨洗如藍四十  
里至白石舖市有魚蝦北岸山多石骨南岸土人樹  
桐取油山薑百合花極燦然可觀十里至穿石舖嘗  
流巨石如覆鐘高約百尺下空若闕二十里至挂榜

山翠屏十二如米襄陽秋山烟雨圖五里至遠溪小  
山數疊雨過雲起蒼翠撲襟維舟留戀

戊戌曉宿霧山峯盡失五里至一望溪溪側二峯峭  
拔東望之惟露一尖如抽林春笋北望則兩尖俱現  
翠擁雙烏角峯頂道院名水僊寨南小溪一曲中藏  
山市二十里過高都驛羣峯插水如笏如簪霧深埋  
未識真面五里至界首塘入辰州境石峯七疊臨河  
壁立成樓置其下十里至甕子洞峭壁激淵流駛舟  
逆前賢穿石繫鍊索於壁舟子援引而上十里至明

黔遊記程

三

月山一峯如青螺浮水上峽間橋一孔望之如月絕  
頂有閣高出雲表下為明月池五里至五丈溪暮雨  
復來維舟以避

己亥曉日銜林舟人解纜灘高浪急廿五里至洞庭  
溪下為夾板灘十里至清浪灘上有伏波將軍廟攀  
崖祇謁溪行者以此灘為最惡冬春水涸怪石橫流  
有瞿塘灑灑之警十里至結灘懸崖置屋燒石為田  
刀耕火耨之鄉也隔岸即銀壺山已暝無所見  
庚子嵐氣迷離水雲一色行十餘里沅陵屈令遣人

挽舟過清浪灘再十里過北溶山椒小聚數十家多  
販油為業舊為水驛今廢二十里至梅子溪一里之  
間三灘聯絡水石相激舟逆浪而上如過戶限十里  
泊九溪

辛丑放舟三十里至辰州府負山阻水城開一面烟  
火數千家關擁辰龍灘橫清浪控谿崙而扼沅湘誠  
楚南之險塞也康熙庚申歲 先人隨

王師西征至關探甲仰攻士卒奮勇一鼓奪之遂復辰  
沅

黔遊記程

四

天威所及全滇底定茲余小子奉

命來黔輕舟卧遊桑麻雞犬民苗樂業緬維往跡感

君恩懷 祖德一時交集郡西溪分為二北曰北河通

永順土司西即沅江是午守令來迎小住解纜行二  
十里泊要溪

壬寅雲氣微陰西風拂面三十里至瀘溪縣山城如  
斗襟瀘帶沅亦小聚落也十里至白沙石壁橫列江  
岸遠望如樓臺層疊洞高三百尺昔人傍穴架木為  
屋下臨深淵每穴可容三五十人蓋亦避兵處岩畔

機床一小艇一因名曰床機巖再上為辛女崖有石  
屹立相傳為高辛氏女所化好事者遂謂機為辛女  
所留船乃沈香製成尤謬是日行六十里泊辛女塘  
下

六月朔癸卯連朝晴霽水落丈餘行三十里山漸開  
豁浦市出焉市千餘家商賈輻輳設通判一員分防  
其地寔沅瀘錯壤之巨鎮二十里至辰溪縣山形如  
箕南臨河怪石支撐建城其上隔岸懸崖壁立曰丹  
山洞崖上橫棧接洞架佛閣三楹飛臨天半峽斷懸

黔遊記程

五

梯以度熊子了餘著屐先之暑甚余弗繼也憶曩時  
修治嵩嶽三十六峯足跡殆遍懸岩峭壁攀引若猿  
猴而熊子屢後今則遊倦濟勝之具亦少衰矣邑南  
二水中分南支入麻陽鎮算再二里泊縣西

甲辰南風逆身緯挽頗滯十里至荆溪中流一洲長  
可二里田頗腴洲尾巨石若砥柱四十里至港口與  
黔西陸路合自西峯至茶灣一帶亂石森列峯巒競  
秀應接不暇沿江俗好競渡每村各具龍舟長十餘  
丈臨岸建瓦屋十五楹覆之



聖世年豐民樂當事者故不禁也是日泊茶灣

乙巳行十五里上鷓鴣灘怪石星羅溪面涸時舟子  
戒嚴江行數日惟清浪與此灘可觀然較汀建之鴨  
蛋陀佛漢江之石屏青草等灘又遜矣十五里至九  
峯西岸削壁上鑄山水蒼泐四字余追視蘚蝕名氏  
已盡二十里至桐窩入沅州界列嶂澄潭清風拂袖  
詩所謂別有天地非人間似與數里出峽地稍展乃  
泊焉

丙午早涼行十里至新路河人家多依東岸迤西石  
磴逶迤通蜀路也二十里至婆田南風又迎舟而來  
兩岸土阜草木浮青而峰石錯落反出溪間舟緣石  
縫而進十里至黃獅洞石磯橫亘飛濤如雪舟繞磯  
上十里至安江司沃野數十里入山來所僅見設巡  
檢一官屬黔陽縣西峯一塔雷轟其半下臨古渡陸  
路兩程達沅水行猶須數日遂維舟以憩

丁未微陰行二十里至茶陵溪濱岸石峯十餘疊上  
有古剎環繞竹木再十里至巖門山均開處露浮圖  
知洪江不遠形家所謂關鎖水口處西岸石巖岩畔

開鑿一綫可容半跬以引緯者再上五里許巨石中  
央若伏獅狀其下羣石紛糾怒濤飛激木筏至此繫  
纜巨石倒挽徐下以避撞擊五里至洪江兩岸列峙  
羣峯大溪北來小溪南滙合流臨江烟火數千家大  
半油商木客設巡檢一負屬靖州之會同縣舟行至  
此水程已半從此轉而北上溪狹灘高撐駕為勞辰  
州巨艦夏秋可達然亦不能再上矣

戊申北行南風稱便滿溪亂石截流疑無路焉二十  
里至周窪溪上大鷓鴣灘怪石三五錯綜若鷓鴣晒

黔遊記程

七

翅渙梁非數舟合挽不能輒上崖畔建大王廟顏曰  
安瀾普濟余揚帆不得泊當招宋玉賦雄風矣三十  
里至黔陽縣城在北岸坦陸面山阻溪城市寂然兩  
水合流北支自沅西來南支名渠水上為清水江自  
夜郎來與沅水會舟由城北而上平岡淺水篷牕穩  
坐去縣二十里泊於桐木窰

己酉曉行十里至高瀟洞志稱其水迅下折而復留  
險與黃獅洞等余乘風泝流雖白石粼粼與之委蛇  
絕無噴湧謂與黃獅等過矣二十里至中方渡遠山

數疊綠疇千畝三十里至榆林灣其北有天然石梁跨澗如砌兩日南風之利至此又左矣

庚戌徹夜南風如吼曉來微殺二十里至公平驛西岸古路沿溪二十里至伏漣塘石槁六孔偃若長虹路側亦間有涼亭可憩第竟日不逢一騎駟路之僻莫此若矣二十里至結漣塘一帶平隴梯田柴門綠樹無復巉巖峭壁壓人眉宇澧蘭沆芷風景依然在日矣

辛亥濃陰四合涼爽如秋行十餘里一塔凌空長虹

黔遊記程

八

卧水片帆落處已抵芷江之龍津橋舊於兩岸用石柱貫鐵索維舟以濟行者萬歷間始砌石槁跨十五洞上建屋如列市明山北峙澧水南流寔楚南之阨塞黔北之通津北行十里轉而西向萬山迴抱一水環流二十里間灘聲絡繹而官洞一灘亂石噴吼轟雷駭浪又來驚人矣

壬子夜月半圭涼生枕簟曉起北風徐來三十里間急灘居半而名滿天星者溪流一綫悉為頑石所踞幾不容舟復怒目狰獰可憎灘上一塔五級巖畔有

關建樓三楹關前茶亭數間殘碑倚石余與諸子登  
崖捫讀藪字知名迴龍關去沅州駟路六十里再上  
曰便水驛一小聚落設弁兵十餘名十里又上黃猴  
灘灘多巨石中泓若槽白白濤疊下合數舟人力共  
引一舟匍匐罔敢失墜墜則倒退撞大石上舟立碎  
而環流諸石方眈眈虎視可與滿天星媿險蓋自沅  
以上山高水建瓴下故余詩有古路時臨水輕舟日  
上山云

癸丑濃雲四合嵐翠如濕二十里至波州雷聲隱隱

黔遊記程

九

山雨欲來維舟避之少頃霽行不數里新漲全涌綠  
波頓失二十里至晃州驛四面土垣上甃以瓦雖無  
百雉完整足恃設守備一員駐防是日銅仁守令來  
迎停舟小叙郡去此百二十里東北與麻陽鎮算接  
壤乃黔之邊服也十里至龍口溪村市頗稠舟子於  
此以益易米再十里至九澗塘泊自晃州南來山麓  
開展夾岸稻畦如布碁如畫卦居人饒有田園之樂  
甲寅行二十里至新寨塘為黔楚接壤鎮算鎮建界  
牌三架顏曰楚南重鎮五里至小港口村居錯落港

內初雨水甚濁過港則又作鴨頭綠矣十里至鮎魚塘入黔境逼連楚地風景未殊十里至苗婁塘嶺上一塔如禿穎十里至銅鼓巖上有石洞擊之鏗然遂泊東岸是日行五十餘里灘名不能屈指惟沿溪石壁海棠倒垂如簪綠鬢殊覺媚人

乙卯行五里至玉屏縣縣依麓北帶黔江水陸通衢為入黔首邑古為雄溪地漢馬援所征五溪之一舊設衛隸楚雍正五年同青谿一併改縣屬黔西上數里石橋七孔曰天星橋跨野雞河蒼籐蟠結其上十

黔游記程

十

里過顯靈灘洞壑天然如半厦如奧室窻檻畢具石乳壘纍松杉倒垂如橫戟二十里至羊坪入青谿界二十里至邊朗上老虎灘斷崖躑踞如虎渴飲泉濤湧其吻余舟失利退流經其吻下卒亦無恙再數里東崖如削上鐫三汲浪數字刻劃粗鄙不類雅人所為十里至青谿縣城跨瑞雲山上有瑞雲宮可望百里外城南面臨水敵樓高出青松白雲上過縣三里許泊小峯月白風清溪山如畫因與王子慕齋熊子了餘小酌

丙辰行五里至雞鳴關關右辟去水百餘尺驛路循  
辟下環水而西頗為險隘關下里許有石丈人拱立  
溪左若關吏肅容狀十里至梅溪南有谷曰栗子冲  
驛路經此渡小橋入谷行自入玉屏來山愈高溪愈  
狹里許一灘而居民又於溪中疊石束水以激輪車  
左右列石如墻中容一棹逆上愈難十里至焦溪入  
鎮遠界二十里至平蠻塘連上大灘三第一灘少平  
第二灘石檻橫塞第三曰三門灘當流夾二石洲水  
分三派右側石坎如納陛左側水如瀑布中流若狹

黔遊記程

二

巷半里許始出險好事者岸樹石椿順流者至此繫  
纜倒放不然一落千丈強兵入黔江來此灘有陝州  
禹門之勢過此不二十里即抵郡治布帆無恙  
丁巳行十五里過武定塘兩岸斷崖千尺舟出峽中  
天光一綫右一峯孤立如浮圖志謂筆岫峯非欵有  
石梁跨絕頂五里抵鎮遠府東祝聖橋九孔跨江南  
北依絕壁各為洞門郡治後枕石屏山列建炮臺前  
阻澗溪水為險南即衛城東西長而狹總鎮率三營

駐劄

戊午信宿行館整治輿馬馬雖小力能載百四十觔  
登山若馭平陸輿人人肩六十觔所需損担則與浙  
閩山中斃子懶收拾類暑甚暮大雨侵晨未止頓若  
新秋

已未冒雨出城行十里上文德關關在峯巔石磴一  
綫壘級下垂輿用繩挽以上約三里許乃生鑿半壁  
建關其上石坎皆就山鑿成一丸泥封不能飛越黔  
南第一關也關內有寺曰文德寺下關未半里即平  
地較關前山足已高二里許十餘里過華岩洞洞口

黔遊記程

十三

宏廠石乳凝結有大士羅漢諸像深入則阻水適瘴  
雲瀰漫未得停輦一遊十里至相見坡兩山對峙中  
隔一溪成樓東西相望招呼如在咫尺一迳盤旋上  
下迴望來峯已十里矣十里至望城山施秉縣城如  
在眼底循山而下小溪環繞稻畦夾岸時雨初過青  
翠奪目十五里渡跨虹橋抵縣治即古偏橋衛城與  
青谿等西峯另築石堡與城相望但不及瑞雲山高  
峻耳

庚申出南關循牆西折而南至五里墩迳稍坦猶拾

級不已過草塘關至沿沙去縣二十里始下嶺五里  
至瀾橋關會食復行十餘里過楊柳塘下有巖曰飛  
雲渡石橋西即月潭寺停輿入石磴嶙峋松柏環繞  
巖身一半剝空如厦大可三架屋高百餘尺石峯皆  
如青蓮花朵朵倒垂又如雨後雲峯萬疊環注正中  
穴深處裝大士像外覆梵閣面立二小峯各一亭亭  
側處見巖上瀑布噴激下注於澗巖下二穴其一深  
不可測內一池清澈可鑑四壁多磨鐫題詠無佳者  
余素耽山水斯為竒獲出寺復度嶺至一澗水潺潺

黔遊記程

十三

出崖右刻玉峽垂虹四字二十里抵黃平州乃新治  
城東南北三面環山西臨澗去舊治四十里  
辛酉越小岡出南門渡東澗拾級登直上二十里至  
周洞由絕頂行雲嵐拂面細雨濕衣俯矚諸峯若兒  
孫羅列下不數里即重安驛渡重安江源出麻哈州  
寬約半里峽高湍悍舊建石橋尋毀今兩岸置大纜  
繫鍊樁上挽舟以渡越江即登山十里至觀音坡十  
里至洛登坡再十里至大風崗下一穴寬深上二穴  
如樓窻穿穴而登穴外架閣一楹草木蔚然下洞約



二十里徑通楊老驛西嵐氣陰森弗能深入一名雲溪洞即道書峙蒼洞天也十里抵清平縣城建山麓稍坦處烟火數百家城北諸山石多峭立如人拱揖狀

壬戌山路稍坦二十里過蠟梅坡少憩十里至石關入谷深四里許狹隘僅容並馬谷口各設一塘以備巡緝二十里至楊老驛建小城南面阻河石迳磊岿騎者步行輿中人跼跼欲墮遙望前山插雲戍樓隱約此來日之山程也渡橋茅店數家而已

黔遊記程

十四

癸亥夜雨旦過楊老塘北乃入平越去郡四十里舊驛路也今改此迳稍捷二十八里至馬廠坪山均稻畦瀕望再五里逶迤下兩巖對峙曰魚梁江石橋三孔高十餘丈跨崖畔水倒峽而下洶湧振耳渡橋循僻上俯視深黝有戒心五里至黃花塘與馬穿雲而度即昨所望之層巖疊嶂也十里至酉陽驛平越腰站驛中茅簷數十家十里度虎場坡五里抵黃絲城與舊路合

甲子行五里度一嶺曰猓羅坡坡萃岿五里至冷溪

少降十里過沙坪至谷嶸關叢柯列嶂拔地插天為  
貴定縣界下山十里紆白繚青有地曰崖頭雨後飛  
泉瀉出峯頂有銀河落九天之勢十里至貴定縣城  
列平岡上街市整肅行館幽潔富庶之徵也

乙丑出西門循級下里許渡溪橋登山五里許曰馬  
桑關又五里至乾溪其嶽崎稍遜於黃平之周崗五  
里至牟珠洞洞在崖半前建梵刹二重壘級而上洞  
口若甕俯而入上有石罅透光如豆高約二丈寬稱  
之中一柱若幢四壁垂峯皆如纓絡後有泉深數尺

黔遊記程

十五

稍左有石門深數里中有潛靈弗敢入山左復有一  
洞曰雷鳴水伏流其中至洞口噴石梁而出五里至  
甕城關渡甕水橋十里至新安舖旅店十餘家十里  
至籠簷過枇杷洞古刹數楹左右二枇杷樹甚大寺  
側一穴因以是名二十里至龍里縣山城荒僻不及  
貴定遠矣

丙寅出城五里渡原溪過廣濟橋道旁有石如象鬚  
鬣飛動名鯉魚石聞城南里許有留雲洞石乳融結  
雲龍變幻駕清平雲溪天然二洞而上之惜未一遊

時山霽一望雲壑高低如湧浪極天無際十五里至  
谷脚舖五里度黎兒關曲迳排雲層崖插碧為貴筑  
縣界十五里渡龍峒河臨流一穴深廣數丈是名龍  
峒五里踰晉寧關有武帝廟并紀恩可憇二亭乃康  
熙辛巳撫軍王公諱燕修建為往來祖席地嶺多奇  
石寺後石笏插天青杉翠竹夾道一綫流泉自關前  
瀉下泠泠如琴筑聲入關則會城遙開半面薨瓦鱗  
次明河如練五里渡霽虹橋跨南明河源出廣順州  
繞郡西南會富水下流為牛渡河至巴香合烏江入

黔遊記程

十六

於岷東曰浮玉橋傍鰲頭磯磯上傑出者曰甲秀樓  
上為芳杜洲下為涵碧潭自橋西去里許曰雪崖洞  
石巖臨水壘石為臺上建來仙閣右側穿崖為洞方  
廣若堂洞後小穴僅容一人側身繞出洞後復有精  
舍三楹崖石白色其鐫題多呂祖乩筆四面樓臺廊  
廡曲折幽邃棲霞東峙富水西來士大夫登眺者不  
絕顧余是日僚屬郊迎疲於勞問山川目未嘗瞬抵  
郡越迎恩門自昭文門入館齋宿

丁卯卜日吉入臬署視事轄十三郡四十九州縣丞

倅分防者十二佐雜分防者二十二民則江廣川粵  
流戶居多苗則種類不一曰狝家宋家蔡家龍家花  
苗白苗青苗紅苗黑苗獯苗東苗西苗九股克孟牯  
羊谷蘭平伐紫薑陽洞羅漢等苗又有犵狫木犵狫  
兜狝獠八番六額子焚人峒人瑤人獯獠等類其剽  
悍者惟銅仁之紅苗八寨丹江清江古州之黑苗黃  
平之九股與大定威寧之獯獠皆性好劫虜鏢弩銳  
利恃其崇巖密箐往往夜郎自大自

天威震懾殲其頑梗撫其柔順近之入市者靡不帶牛

黔遊記程

二

佩犢兵會城四面環山東山銅鼓樓霞唐帽在其東  
金猫五虎獅子坎馬在其西文筆斗巖高連飛鳳在  
其南黔靈白巖金鰲相寶在其北富水前綬誠坤位  
阨塞城列五門天啓間復於北門外建城六百餘丈  
設四門北通巴蜀西達滇商賈輻輳之區城抱數岡  
中界貫城河撫軍居東岡牙門高峙羣峯列戟藩署  
在中岡居翠屏峰下河西岡上即臬署建於順治十  
六年規模宏敞署西有古夢草池碧波數畝蒔以白  
蓮夏秋之交憑欄矚目如坐樂天於綠蘿陰下紅藕

花中

黔遊記程

六

昔人云太史公周歷名山大川故其文踈藹有  
奇氣自後贈遠述遊之篇類皆援引茲義侈陳  
揚厲曰壯行色以致士君子得志於時過都越  
國鳴笳在路結駟連鑣即以文章發之寫其望  
闕懷親之感然齊魯燕趙吳越諸邦古今作者  
代不乏人惟黔在西南數千里外自武陵以迄  
無傳文

崔公拙圃少時即負雋才為裴中立范希文一

三序

聖天子簡任黔臬度瀟湘越沅澧經見猺獞之雜  
指煙嵐之蔽虧異代滄桑之感累世忠孝之思  
破浪乘風憾心震目一寓於文而筆之為黔遊  
記以余從遊命言為跋余為之午夜篝燈讀其  
積日之所草情致旖旎搖筆散花憑吊山川低  
徊今昔或挂席而宵征或扃蓬而午夢道途共  
歷皆余襍被佳勞哀吟永嘆之處歲月一往恍

如隔世次是記而心目間又若過之豈漆園所  
謂去國期年見似人而喜者耶嗟乎余異日息  
肩田間燕閒披閱愜然悟陸沉筆硯之艱難何  
能若隴畝犁鋤之逸固足為窮居之一快且以  
此疎蕩奇氣之文告夫筮仕得志者水驛山程  
燦然列眉不必問道於溪翁野叟而因以識瘴  
雨之蒸濡花布之裝束則亦是記之助也夫  
乾隆丙子春日蕭山後學王彭撰并書

